

**REGIONAL NEWS BULLETIN  
HEADLINES (EVENING)**

**Date – 26/09/2024**

**Time - 18:30 Hrs**

1. Commonwealth Parliamentary Association, India Region Zone -III Annual Conference vawi 21-na Aizawl a neih tur hmanpui turin vawiin khan Lok Sabha Speaker Om Birla chuan Aizawl a rawn thleng.
2. Swachhata Hi Seva kalpui mekah vawiin hi Hmarchak huamchhung bik tan nasa leh zual a beihpui thlak ni- Mega day a nih angin Mizoram NSS-te chuan hmun hrang hrangah faina beihpui an thlak.
3. President Draupadi Murmu chuan vawiin khan Ladakh-a Siachen Base Camp a tlawh.
4. French President Emanuel Macron chuan United Nations Security Council-a member nghet ni turin India chu an thlawp tih a sawi.

<><><>

**COMMONWEALTH PARLIAMENTARY ASSN**

Commonwealth Parliamentary Association, India Region Zone -III Annual Conference vawi 21-na Aizawl a neih tur hmanpui turin vawiin khan Lok Sabha Speaker Om Birla chuan Aizawl a rawn thleng. Naktuk leh naktipa Aizawl a neih tur he khawmpui hmanpui tur hian vawiin chawhnu dar 1:00 khan Lok Sabha Speaker Pu Om Birla hi alo thleng a, Mizoram Speaker Pu Lalbiakzama, Lok Sabha MP Pu Richard Vanlalmangaiha, Chief Secretary Dr. Renu Sharma leh Official dangte'n an lo hmuak a ni. Lok Sabha Speaker hian naktuk chawhma ah Mizoram Legislative Assembly Library-a Archive Cell a hawng dawn a, hemi zawh hian Session Hall ah thu a sawi dawn a, amah bakah hian Rajya Sabha Deputy Chairman Harivansh Nayaran Singh leh Nagaland Legislative Assembly Speaker Sharingain Longkumer in thu an sawi dawn a, Mizoram Chief Minister Pu Lalduhoma pawhin thu a sawi dawn bawk a ni.

Ruahman lawk dan chuan Lok Sabha Speaker hian Session Hall-a thu a sawi zawh hian chawhnu dar 2 ah Mizoram Legislative Assembly Committee Room ah thuthar thehdarhtute a kawm dawn a, hemi zawh hian sawrkar mi pawimawh hrang hrang leh sawm bik te nen Plenary Session ah “Inclusion of the Northeast Region in the India-ASEAN Vision for Trade and Cooperation” tih thupui an sawiho dawn a, zan lamah Mizoram Legislative Assembly Conference Hall ah Chief Minister Pu Lalduhoma buatsaih Cultural program a hmanpui dawn a ni.

<><><>

**CM**

Chief Minister Pu Lalduhoma'n thalai mahnia eizawna tur din kawnga theihna neite tana hmalakna tur Handholding Scheme hnuaiyah a awm a ti.

He thu hi vawiina Serchhip Teachers' Association (STA) General Assembly a hmanpui naah sawiin Chief Minister chuan hun hmasa lamah lekhathiam tan sawrkar luh a awlsam a, tunah erawh lekhathiam an tam tawh avangin sawrkarah luh a harsa hle a ti a, Mizoram sawrkarah hna ruak tlem mahse India sawrkarah erawh chuan luh theihna a la tam reng tung tih sawiin thiamnain a tlin phawt chuan SSC, Railway Recruitment Board leh IBPS lamah hna a tam hle a ti a, Mizorama rel kawng tlang turah pawh rail station enkawl tur Mizo thalai Railway Officer leh staff tam tak an mamawh dawn tih sawiin Mizo thalaite zirna lamah nasa taka tang turin a chah a ni.

Chief Minister chuan Sawrkarin mahnia eizawna tur din lama theihna neite tana hmalakna tur Handholding Scheme hnuaiyah a awm tih sawiin infiamna lama talent nei thate dap chhuah leh naupangte tanpui zui zel a tul tih a sawi bawk.

Chief Minister hian Golden Jubilee Souvenir a tlangzarh a, MLA Trophy (Inter School Challenge) lawmman dawngtute hnenah lawmman a hlan a, He inelna hi school naupangte an zirlai behchhana an inelna a ni.

<><><>

## **HOME MINISTER – MZP ASSEMBLY**

Home Minister Pu K. Sapdanga'n hnam humhalh a pawimawh tih sawiin Mizoram run mektu ruihhlo laka fihlim tur leh a do kawnga tanrual a tul tak zet a ti.

He thu hi vawiina Mizo Zirlai Pawl Assembly vawi 68-na hun ngana Thanghlianga Sailo Run, Champhai Tlangsama neih a hmanpui na ah sawiin Pu K. Sapdanga chuan Mizoram leh hnam humhalh a pawimawh a ti a, Mizo mipa te suattu ruihhlo do kawngah tanrual a pawimawh tih sawiin ram leh hnam humhalh nan zirna ngaih pawimawh leh ruihhlo do chu hna hmasaah neih a ngai tih a sawi.

Pu K. Sapdanga chuan Mizoram sawrkarin flagship programme - 'Bana kaih' hmangin thalai taima, mahni intodelh tum te tan kawng a hawng mek a ti a, Ram leh hnam humhalhna kawnga pawimawh tak taimakna leh thawhrimna a ni tih hre reng turin zirlaite chu a chah a ni.

Mizo Zirlai Pawl Assembly vawi 68-na hun ngana hi Pu Zairemthanga, Treasurer, MZP General Headquarters chuan a kaihruai a. Pu C. Lalrokhuma, Adviser hnen atangin Assembly thupui - 'Ram leh hnam tan - Mizo Zirlaite' sawizauna ngaihthlak a ni a. General Headquarters report, Headquarters Report leh Hnam Pual Zirlai Pawl te hnen atangin thu sawi ngaihthlak a ni bawk.

<><><>

## **SWACHHATA HI SEVA**

Swachhata Hi Seva kalpui mekah vawiin hi Hmarchak huamchhung bik tan nasa leh zual a beihpui thlak ni- Mega day a nih angin Mizoram NSS-te chuan hmun hrang hrangah faina beihpui an thlak.

India rampum huapa faina beihpui thlakna programme Swachhata Hi Siwa hi Mizoram NSS chuan September ni 17 atang khan hmangtanin Mizoram chhunga NSS Unit dinna University, College, Technical Institution leh Higher Secondary School hrang hrang te chuan kawng chi hrang hrangin faina beihpui an thlak thin a, an School leh College hnaiha awm damdawi in, Vantlang hmun, Bazar, Kawngdung, Stadium, Park leh Thlanmual-te tifaiin an hnatlang thin a ni.

Mizoram NSS-te hi Sarang (plastic waste) quintal 960 vel paih turin Central chuan bitukin vawi 70 chuang hnatlang hi a kalpui tawh a, bawlhhlawh tam tak an thianfai tawh a ni.

Swachhata Hi Secva pual hian tukin dar 7 khan Hnahthial District-a UD&PA leh ICDS bultumin Swachhata Hi Seva 2024 leh Poshan Maah pualin intlansiak, 'Swachhata Run cum Poshan Walk' buatsaih a ni a, Lunglei District ah chuan Urban Development & Poverty Alleviation Department leh YMA Theiriat Branch te chuan Theiriat CTU huam chhunga kawngpui kam hnim sam fai leh a paihna hmun ni lova bawlhhlawh paih thian faiin an hnatlang a, Akashvani Aizawl ah pawh thawktuten pisa leh a chhehvel thian faiin an hnatlang bawk.

Lunglei Urban Development & Poverty Alleviation (UD&PA) Department, Lunglei leh Young Mizo Association (YMA) Theiriat Branch te chuan Theiriat CTU huam chhunga kawngpui kam hnim sam fai leh a paihna hmun ni lova bawlhhlawh paih then fai hnatlang an thawk.

Theiriat CTU hi Swachhata Hi Seva 2024 kalpui chhunga Lunglei khawpui huam chhung (urban area)-a vantlang hmunhma then fai ngai bik [cleanliness target unit (CTU)] ruahman pariat zinga pakhat a ni a. Hnatlangah hian Theiriat Branch YMA member-te leh UD&PA Lungleia thawktute mi 60 vel thawk chhuakin, hnim sam fai a, bawlhhlawh an then fai bakah, he lai hmuna kalte'n bawlhhlawh an paihna tur bawlhhlawh bawm an hung nghal a ni.

<><><>

## **WORLD TOURISM DAY**

Tourism Minister Pi Lalrinpuii'n Mizoram ralmuanna hman tangkaiin khualzin hip kawngah nasa zawka than theih a beisei tih a sawi.

He thu hi vawiina Tourist Lodge Conference Hall, Chaltlang-a World Tourism Day vawi 44-na a hmanpui na ah sawiin Minister chuan Mizoram in khualzin hipna tha

tak a neih chu remna leh a hmun ralmuanna ni a ti a, kumina World Tourism Day thupui 'Tourism and Peace' tih chu Mizoram mawina leh muanna nen a inhmeh hle tih sawiin ram ralmuangah hmasawna tam tak a awm thin a ti a, SASCI hnuiaia tourism ruhrel siamna kawngah hmalak mek ani tih sawiin hnam ziarang leh nunphung leh hnam chin dan zahpui lova, uar taka khawvel hmuha phochuhah a pawimawh tih a sawi.

Minister chuan MLA te chu an bial tinah khualzinte hip nan Homestay kalpui uar zel turin a chah a. Khualzinte chu thliar hrang lovin mahni sum hnar eizawna min siamsaktu an nih angin hawihhawmna leh kawm nuam takin min tlawhtute hmachhawn thin turin kalkawmte a chah a. Tourism hmasawna ruhrel lamah sang rih lo mahse a thawhchuah kawngah tan an lak chuan khualzinte tun aia nasa an hip lut thei dawn a ti bawk. Minister chuan nikum lamah Reiek khua-in best tourism village a dawng chu lawmawm tih sawiin kuminah Sialsuk khua-in best tourism village 2024 a dawng thei chu a lawmpui thu a sawi a, wawiina hun hmanah hian Tourism Excellence Award chu inelna chi hrang hrang 12 ah lawmman sem a ni bawk.

<><><>

### **MZP GENERAL ASSEMBLY**

MZP General Assembly vawi 68-na rorel inkhawm ah Zofa hmun hrang hranga awm te'n, inpumkhatna nghet zawk an neih theih nan MZP-in hma la chhunzawm zel rawh se tih chu pawm a ni. Mizo Zirlai Pawl Assembly vawi 68-na, Champhai Tlangsama neih hi nimin piah zanah bultan a ni a, niminah Chief Minister Pu Lalduhoma hovin hun hman niin chawhnu lamah rorel inkhawm neih a ni a, hetah hian thurel tura chhawpchuah lut 6 awmin a vaiin pawm vek a ni.

MZP thurel pawm zingah hian Mizoram zirnain hma a sawn theih na tur atan Directorate of School Education chu Elementary leh Secondary-ah then anih theih nan hmalak leh Zofa hnam hrang hrang Zirlai pawlte nen thawhhona a that zawk theih nan "Students' Leaders Meet" neih te leh Zofa hmun hrang hranga awm te'n, inpumkhatna nghet zawk an neih theih nana hmalak te, Mizoram chhunga inkal pawhna kawngpui sialtu, NHIDCL leh hnam dang company ten tha zawka hna an thawh theih nana hmalak te leh Mizoram Schedule Tribe List ennawn a nih theih nana hmalak bakah Sawrkar hnathawk mahni nihna in a ken tel aia tam, hamthatna la leh hmang te sawrkarin a tih tawp theih nana hmalak te chu pawm a ni. MZP General Assembly vawi 68-na hi tun September ni 24 zanah Champhai Tlangsam a Pandal ah tan a ni a, Nimin kha Assembly palaite thlen kim ni a ni a, Chief Minister Pu Lalduhoma bakah hian Home Minister Pu K. Sapdanga leh Education Minister Dr. Vanlalhlana ten hun hran theuhah an hmanpui dawn a ni.

<><><>

### **PRESIDENT P**

President Draupadi Murmu chuan vawiin khan Ladakh-a Siachen Base Camp a tlawh. President Murmu-i hian Siachen-a sipai duty te hi kawmin an huaisenna leh ram rawng an bawlnaah fakawm a tih thu a sawi a. Sik leh sa hreawm tak karah ram venhim hna ngawrh taka an thawk chu ropui a tih thu a sawi bawk a ni. President Draupadi Murmu-i hi President zinga Siachen Glacier tlawh pathumna a ni a. President hlui APJ Abdul Kalam leh Ram Nath Kovind te khan an lo tlawh tawh bawk a ni.

<><><>

### **FRENCH SUPPORTS INDIA IN UNSC**

French President Emanuel Macron chuan United Nations Security Council-a member nghet ni turin India chu an thlawp tih a sawi. UN General Assembly vawi 79-na New York-a neih mekah he thu hi sawiin Pu Macron-a chuan India, Germany, Japan leh Brazil te chu Security Council-ah hian member nghet permanent member ni turin a rawt a. Heng bakah hian Africa atangin member pahnih an aiawh tur awm bawk se a ti bawk. French President chuan UN chu chak zawk leh huaptha zawk turin chunglam atanga siamthat a ngai a, abik takin tuna Security Council ruangam hi thlak a ngai a ni a ti.

Hemi hma hian US President Joe Biden, Russian Foreign Minster Sergei Lavrov leh Chilean President Gabriel Boric Font te chuan UNSC-a tel turin India chu an thlawp tih an sawi a ni.

<><><>

## CEASEFIRE

US, France leh an tanrualpui ramte chuan ni 21 chhung Israel leh Lebanon ramriah inkahhai puan an duh. United Nations inhmukhawmah he thu hi sawiin Gaza-a inkahhai pawh an thlawp tih an sawi a. Thuchhuah intawm siamin tunhnaia indona thleng mek chu ngaihthah chi a nih loh thu leh buaina nasa zawk thlen thei anih thu an sawi a.

Israel leh Lebanon sawrkar leh he indonaa inhnamhnawih zawng zawngte chu UNSCR 1701 tlawhchhana inkahhai puang tur leh inbiakna kawng zawh turin an ngen a. Kum 2006 Security Council thutlukna angin Lebanese ramriah sipai inkulh phaklohna tur Blue Line siam nise an ti bawk a ni.

He thuchhuahah hian US, Australia, Canada, EU, France, Germany, Italy, Japan, Saudi Arabia, UAE leh Qatar ten an ziaak a ni.

<><><>

## PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hman leh dawn a. Mizo tawnga lehlinin a zui ang. Tun tum ami hi episode 114-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestream a ni ang.

<><><>